



المسلم وصبره عفوہ

So Muslim a go so Kapantang a go Karila'

(al Khutbah 15)

Ki: Alim Hassanor M. Alapa

al Murshid al Am

al Insan Islamic Assembly of the Philippines

إِنَّ الْحَمْدَ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْ فُسِنَا وَسَيِّئَاتِ
أَعْمَالِنَا مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَنْ تَجِدَ لَهُ وَلِيًّا مُرْشِدًا ، وَأَشْهَدُ أَلَّا إِلَهَ
إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ ، اللَّهُمَّ صَلِّ وَسَلِّمْ وَبَارِكْ
عَلَى مُحَمَّدٍ صَلَّى اللَّهُ عَلَيْهِ وَسَلَّمَ وَعَلَى آلِهِ وَصَحْبِهِ وَمَنْ اهْتَدَى بِهَدْيِهِ إِلَى يَوْمِ
الدِّينِ... وَبَعْدُ:

فَيَا عِبَادَ اللَّهِ يَقُولُ الْحَقُّ تَبَارَكَ وَتَعَالَى فِي الْقُرْآنِ الْكَرِيمِ:

قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَنْ تَبِعَ هُدَايَ فَلَا خَوْفٌ عَلَيْهِمْ
وَلَا هُمْ يَحْزَنُونَ .

Innalhamda lillāhi nahmaduhu wa nastānuhu wa nastagfiruh, wa na'ūdubillāhi min shurūri anfusinā wa sayyiāti a'mālinā, man yahdihillāhu falā mudhillalahu, wa may yudhlil falan tajida lahu waliyyan murshidā, wa ash'hadu allā ilāha illallāhu wahdahu lā sharīka lahu, wa ash'hadu anna Mohammadan abduhu wa rasūluh, Allāhumma salli wa sallim wa bārik alā Mohammadin sallallāhu alayhi wa sallama wa alā ālihi wa sahabihi wa manihtadā bihad'yihī ilā yawmidd dīn wa ba'du:

Fayā ibādallāhi, Yaqūlul Haqqu Tabāraka wa Ta'ālā fil Qur'ānil Karīm:

Qulnah bitū minhā jamīan fa'immā ya'tiyannakum minnī hudan faman tabi'a hudāya falā khawfun alayhim wa lā hum yahzanūn.

So langowan a podipodi ago so samporna a bantog na rk o Allāh (سُبْحَانَهُ وَتَعَالَى), bantogn tano Skaniyan go mamangni tano ron sa tabang, ago mangni tano Ron sa sapngan Iyan so manga dosa tano, go lomindong tano ko Allāh (سُبْحَانَهُ وَتَعَالَى) phoon ko manga antiyor o manga ginawa tano, ago so pangararata o manga galbk tano, sa taw a toroon skaniyan o Allāh (سُبْحَانَهُ وَتَعَالَى) , na da' a makadadag on, na sa taw a dadagn iyan na di nka dn mitoon sa salinggogopa' iyan a phakatoro' on.

Manga Oripn o Allāh

So sanang a Muslim a inggogolalan iyan so manga nda'o o Islam na mapantang a go manapi sii ko manga taw. So kapantag na maporo' a paparangayan o manosiya a mapiya a tanto a mala' a kiaslaa on o Qur'ān a so taw a khakowa niyan anan na pmbaloy a mapiya a ladiawan sii ko kapiya a go so kaalkn ko Allāh (سُبْحَانَهُ وَتَعَالَى) sii ko Islam, a go khiitong skaniyan a pd ko siran oto a manga taw a giinggagalbk sa mapiya a makasisigoro siran ko kakhakowaa iran ko kasoso'at o Allāh (سُبْحَانَهُ وَتَعَالَى).

Pitharo' o Allāh (سُبْحَانَهُ وَتَعَالَى) a:

.... وَالْكََاظِمِينَ الْغَيْظَ وَالْعَافِينَ عَنِ النَّاسِ قُلْ وَاللَّهِ يُحِبُّ الْمُحْسِنِينَ ﴿١٣٤﴾

A go igagabn iran so gani a go manga pananapi siran ko manga taw, so Allāh na pkebabayaan Iyan so manga taw a Makapiyaan. (Sūrah Ali Imrān 3: 134)

Giyankoto a manga taw na miakompn iran so rarangit iran a go miapantang iran o ba adn a igadong iran a rarangit ko manga salakaw. Na siran oto na miamaradika' iran a ginawa iran ko sarinkot o kagowad a go so rarangit sa miakasold siran ko mapiya a bago a doniya o kapantang a go karila'. Sa miasokat iran so kalolompiyo o poso' a go so kapakaddkha' o pamikiran, na aya olowan oto na miaparoli ran so kasoso'at o Allāh (سُبْحَانَهُ وَتَعَالَى).

So kapantang a go so karila' na manga ala' oto a paparangayan a maito' a phakakowa on inonta bo' so siran oto a so manga poso' iran na miakaoml sii ko manga gonana'o o Islam a go so manga pipiya a nda'owan iyan. Sa miapakataralbi ran so karila' a go so balas o Allāh (سُبْحَانَهُ وَتَعَالَى) a di sa ba aya onotan iran na so maratabat iran a go so kabaya' sa kasa'op.

Sii ko pithamanan a mapiya a bontal, na so Qur'ān na ipphangoyat iyan ko ginawa o manosiya so kakowaa niyan sank'a'i a margn a tanggongn a paparangayan a maporo' i pankatan. Piakay o Islam sii ko isa a taw amay ka lalimn skaniyan a kalindinga niyan ko ginawa niyan sa rnn iyan ankoto a ringasa a misosogat on, sa di niyan pakasobraan so diyanka' iyan sa so mata na kitas iyan so mata, ogaid na da niyan pakaya ko taw a piamabaan o ba niyan osara so kazaop iyan a piakay ron sa ba niyan baloya a okit ko kasiksa' sa makasobra ko manga tamana' iyan. Sa aya dn a mapiya on na so kakompna niyan sa ginawa niyan sa misampay skaniyan ko pankat a kaphantang a go karila', a tanda' oto o kabibilangataw niyan a go aya inampilan iyan so isa a nganin a mala' a khalaba niyan on a di so kazaop iyan a matatago' skaniyan ko piligro, sa so baraakal na aya dn a philiin iyan na so malbod a mala' a khakowa niyan on a balas.

Pitharo' o Allāh (سُبْحَانَهُ وَتَعَالَى) a:

وَالَّذِينَ إِذَا أَصَابَهُمُ الْبَغْيُ هُمْ يَنْتَصِرُونَ ﴿٣٩﴾ وَجَزَاءُ سَيِّئَةٍ سَيِّئَةٌ مِثْلَهَا ۖ فَمَنْ عَفَا وَأَصْلَحَ فَأَجْرُهُ عَلَى اللَّهِ ۗ إِنَّهُ لَا يُحِبُّ الظَّالِمِينَ ﴿٤٠﴾ وَلَمَنِ انْتَصَرَ بَعْدَ ظُلْمِهِ فَأُولَٰئِكَ مَا عَلَيْهِمْ مِّنْ سَبِيلٍ ﴿٤١﴾ ۗ إِنَّمَا السَّبِيلُ عَلَى الَّذِينَ يَظْلِمُونَ

النَّاسَ وَيَبْغُونَ فِي الْأَرْضِ بِغَيْرِ الْحَقِّ ۗ أُولَٰئِكَ لَهُمْ عَذَابٌ أَلِيمٌ ﴿٤٢﴾ ۖ وَكَمَنْ
صَبَرَ وَغَفَرَ ۖ إِنَّ ذَٰلِكَ لَمِنْ عَزْمِ الْأُمُورِ ﴿٤٣﴾

Go so siran oto a igira miasogat siran o kapamaba' na pphakadaag siran (39) Aya balas o marata' na isa a marata' a datar iyan (a isa i balas), na sa taw a nomapi a go mompiya na so balas iyan na sii ko Allāh, mataan a Skaniyan na di' Niyan khabayaan so manga Salimbota a Pananakoto (40) Go sa taw a makadaag ko oriyana o kialalima on na siran oto na da' a patoray kran a okit (a kasiksa') (41) Mataan a so okit (a siksa') na pnggolalan ko siran oto a phlalimn iran so manga taw a go pphamaba' siran ko lopa' sa da' a kabnar iran, siran oto na adn a bagian iran a siksa' a masakit (42) Go sa taw a zabar a go romila' na mataan a gioto na pd ko maththkhs a manga btad (43). (Surah as Shuraa 42: 39-43)

Gowani a so Abū Bakr na kalankoloban skaniyan o rata' a ginawa niyan sabap ko kiatokasi o manga monāfiq ko wata iyan a A'ishah a karoma o Rasūlullāh (صلى الله عليه وسلم), na mizapa' sa di niyan dn iphangalimo' so manga taw a pphamgan iyan sa panabang sabap ko kiapangpd iran sa nkoto a kabokhagan a thothol. Na piakatoron o Allāh (سُبْحَانَهُ وَتَعَالَى) so katharo' iyan a aya dn a kabaya' iyan na so di kapinda o kanggolawla sa mapiya sii ko manga taw mapiya pn marata' so manga galbk iran sii rkaniyan, ka kagiya so limo' on o Allāh (سُبْحَانَهُ وَتَعَالَى) na an di khapotol sa sagogona.

Pitharo' o Allāh (سُبْحَانَهُ وَتَعَالَى) a:

وَلَا يَأْتَلِ أُولُو الْفَضْلِ مِنْكُمْ وَالسَّعَةِ أَنْ يُؤْتُوا أُولِي الْقُرْبَىٰ وَالْمَسَاكِينَ
وَالْمُهَاجِرِينَ فِي سَبِيلِ اللَّهِ ۖ وَلْيَعْفُوا وَلْيَصْفَحُوا ۗ أَلَا تُحِبُّونَ أَنْ يَغْفِرَ اللَّهُ
لَكُمْ وَاللَّهُ غَفُورٌ رَحِيمٌ ﴿٢٢﴾

Go di' pzapa' so adn a kalbihan iran a pd rkano a go kaloloagan a di' niyan kambgi ko manga dadazg a tonganay a go so manga Miskin a go so manga Muhājir sa lalan ko Allāh, sa rila' siran a go dapay siran, ba niyo di khabaya'i a karila'i rkano o Allāh, a so Allāh na Paririla' a Masalinggagawn. (Surah an Nūr 24:22)

So giikandodolona' o manga taw sii ko sold o ingd a Islam na di makaphapasod ko kazzndita', a kapanoriman odi na kazasa'opa sii ko maito' mala' a simokt a pkhaadn kiran. Sa aya patot na sii makaphasod ko kazasabara' a go kapnanapiya'i a khaponas iyan ankoto a manga rarata' a btad, sa giyanan i nda'owan o Islam ko manga pagtaw niyan a go giyanan i inipangoyat o Allāh (سُبْحَانَهُ وَتَعَالَى) ko manga oripn iyan a miaaloy ko Qur'an

وَلَا تَسْتَوِي الْحَسَنَةُ وَلَا السَّيِّئَةُ ۗ ادْفَعْ بِالَّتِي هِيَ أَحْسَنُ فَإِذَا الَّذِي بَيْنَكَ وَبَيْنَهُ
عَدَاوَةٌ كَأَنَّهُ وَلِيٌّ حَمِيمٌ ﴿٣٤﴾

Go di' makaphlagid so mapiya a go so marata' sa rnn ka so skaniyan so lbi a mapiya (sii ko marata') ka mitkaw a so taw a adn ko It iyo a karido', na mabaloy skaniyan a Salinggogopa' a Bolayoka' aka a mapiya. (Sūrah Fussilat 41:34)

Amay ka so marata' na ibadal on so datar iyan a marata' na so onga niyan na mabasng a marata' a khaonga niyan so kagowad a go so kaprirido'ay a aya ondas iyan na so kapatay. Na amay ka so marata' na badalan sa mapiya na khapadng iyan so sorazab o marata' sa khitaplk so rido' na khaoyag so mapiya, sa so di ppharowa' a makazisimnga' na pmbaloy siran a mbolayoka' a zosorot a di makapthirawa' ko mapn'd a btad iran sa kholambowan siran o kalilintad a go kapipiya ginawa.

Sa giyanan na mala' a kapakataban sii ko taw a miapgs iyan so gani niyan a go so rarangit iyan sa khalkaan on so manga pinto' o limo' na khalkhban on so manga paytaw o marata' a so sisiyapn o Shaytān a kallka'i ron ko langowan o masa ka an dn kabinasa'i.

Giyanan i paparangayan o Mu'min sii ko kaphagingd a Islam a aya manga taw niyan na manga taw a pkhababayaan iran so mapiya a go so kalilintad sa ipkhagowad iran so marata' a go so kaiitabo'. Giyanan i sabap a so Rasūlullāh (صَلَّى اللهُ عَلَيْهِ وَسَلَّمَ) na tanto a mala' a kinisaparn iyan ko manga Sahābah niyan o ba siran gii prangit ka so kaprangit sa di ontol na kabinasaan a onga niyan sii ko lawas o taw a go sii ko ingd iyan a go so pagtaw niyan.

So manga sabdan o Rasūlullāh (صَلَّى اللهُ عَلَيْهِ وَسَلَّمَ) na tanto a mala' a kiniawidn iyan a akal sank'a'i a mapiya a parangay a karila' a go kanapi a go kapantang. Sa inisogo' iyan so katharagomabaya on sii ko manga poso' o manga Muslim, sa initoro' iyan so lalan a pagokitan on sa kakowaa on o Muslim. Sa so dn so Rasūlullāh (صَلَّى اللهُ عَلَيْهِ وَسَلَّمَ) i ladiawan a maporo' ko kiapakabkna sank'a'i a mapiya a parangay ka an kasayani o manga ummat iyan sii sa pkhaori.

Pitharo' o Aishah a:

Da dn maadn so Rasūlullāh (صَلَّى اللهُ عَلَيْهِ وَسَلَّمَ) o ba adn a biasal iyan a taw, babay, antaa ka oripn sa ba so dn so lima niyan, igira bo' a giimakithidawa' sa lalan ko Allāh, a go da dn a ba niyan piakasakiti a taw odi na ba niyan siaopi, inonta bo' amay ka so taw na sopakn iyan so kitab o Allāh, a go igira somiaop sa pantag ko kabnar o Allāh. Pianothol o Muslim.

Miabaloy so Rasūlullāh (صَلَّى اللهُ عَلَيْهِ وَسَلَّمَ) a da dn a datar iyan a mapiya i parangay ko manga kaadn o Allāh (سُبْحَانَهُ وَتَعَالَى), sa miakhabnar iyan a kabaloy niyan a rawatn o manga taw sa so dn so Allāh (سُبْحَانَهُ وَتَعَالَى) i miantog on ko kapiya o manga paparangayan iyan, sa di niyan imbadal ko marata' so datar iyan a marata', sa aya ipzambi' iyan on na so mapiya, sa ipzogo' iyan so mapiya, na di niyan plilingayin so manga taw a sonkiawa' a balaola a marata'.

Pianothol o Anas bin Mālik a:

Phlalakaw kami a pd akn so Rasūlullāh (صَلَّى اللهُ عَلَيْهِ وَسَلَّمَ) a skaniyan na ndiditar sa gabar a phoon sa Najrān a adn a lapilapi iyan a mala', na miakaoma on a badawi na kiptan iyan so gabar o Rasūlullāh (صَلَّى اللهُ عَلَيْهِ وَسَلَّمَ) na giyandrot iyan sa mabagr sa miailay akn so waga o Rasūlullāh (صَلَّى اللهُ عَلَيْهِ وَسَلَّمَ) a miniban'g on so lapilapi o gabar iyan sabap sankoto a gandrot a mabagr. Na pitharo' ankoto a badawi a hay Mohammad sogo' ka sa kabgan ako ko tamok o Allāh a so

makokowa nka! Na siangoran skaniyan o Rasūlullāh (صَلَّى اللهُ عَلَيْهِ وَسَلَّمَ) a lomalangas a paras iyan, oriyan iyan na inisogo' iyan a bgan skaniyan sa tamok. Pianothol o al Bukhārī a go so Muslim.

Allāhu Akbar, di ta khagaga mamimikiran so kananaw o Rasūlullāh (صَلَّى اللهُ عَلَيْهِ وَسَلَّمَ) a go so kala' o limo' iyan a go so gagaw niyan ko manga taw. Miabaloy so mapiya a parangay a mikhota' sii ko poso' iyan sa miapno' iyan sa da dn a ba on darpa' o rarangit a go so gani a go so kasaop sa rido'. Apiya so babay a Yahūdi a diotiyān iyan so Rasūlullāh (صَلَّى اللهُ عَلَيْهِ وَسَلَّمَ) na kiarilaan iyan sa da niyan saopi a so dn so kaoyagoyag iyan i pagotangn iyan. Pianothol o al Bukhārī a go so Muslim a go so salakaw kiran a:

Adn a sakataw a babay a Yahūdi a bigan iyan so Rasūlullāh (صَلَّى اللهُ عَلَيْهِ وَسَلَّمَ) sa sapo' a kambing a dodotiyān iyan. Na kiyān o manga Sahābah niyan a go skaniyan na so kiakkhba niyan on na inithopha niyan sa pitharo' iyan a targ kano ka dodotiyān anka'i a sapo' na inidarpa' so babay ko hadapan o Rasūlullāh (صَلَّى اللهُ عَلَيْهِ وَسَلَّمَ) na inizaan iyan o ino niyan oto zowaa? Na pitharo' iyan a: Kibayaan akn a katokawi akn o bnar a ska na Nabī, sa phakitokawan rka o Allāh a go di ka mapatay o doti. Na opama o di ka bnar a Sogo' na miapokas ka rkami. Na pitharo' o manga Sahābah o Rasūlullāh (صَلَّى اللهُ عَلَيْهِ وَسَلَّمَ) a: Ba ami skaniyan mbono'a? na pitharo' iyan a" Di', sa rinilaan iyan.

Gowani a so pamiliya a Daws na somopak siran sa di siran phangongonotan ko sogo'an o Allāh (سُبْحَانَهُ وَتَعَالَى) a go so Sogo' iyan, na so at Tufayl in Amr ad Dawsī na somiong ko Rasūlullāh (صَلَّى اللهُ عَلَيْهِ وَسَلَّمَ) sa pitharo' iyan on a:

So pagtaw o Daws na somiopak siran, sa pangnin ka siran ko Allāh sa maantiyor siran. Na so Rasūlullāh (صَلَّى اللهُ عَلَيْهِ وَسَلَّمَ) na somiangor sa Qiblat na iniporo' iyan a lima niyan, na pitharo' o pagtaw a minitaman so pagtaw a Daws (ka phmorkaan siran o Rasūlullāh). Ogaid na so Rasūlullāh (صَلَّى اللهُ عَلَيْهِ وَسَلَّمَ) a skaniyan na masalinggagawn a go mapantang a matigr na inipamangni niyan ba dn so Daws sa pitharo' iyan a: Ya Allāh toro' anka so Daws sa wit anka siran sii, Ya Allāh toro' anka so Daws sa wit anka siran sii, Ya Allāh toro' anka so Daws sa wit anka siran sii. Pianothol o al Bukhārī a go so Muslim.

Piamola o Rasūlullāh (صَلَّى اللهُ عَلَيْهِ وَسَلَّمَ) ko poso' o pagtaw niyan so paparangayan a kapantang a go kanapi, mapiya pn sii dn ko masa a ibobowang skaniyan o manga taw, sabap ko knal iyan sa so Allāh (سُبْحَانَهُ وَتَعَالَى) na babid iyan so manga taw a manga papantang a go manga titigr. Sabap roo na so Uqbah bin Amir na inizaan iyan so Rasūlullāh (صَلَّى اللهُ عَلَيْهِ وَسَلَّمَ) sa pitharo' iyan a:

Ya Rasūlullāh tharo' anka rakn so pithamanan a mapiya a galbk. Na pitharo' iyan on a: Hay Uqbah khoyaptaan ka so taw a initolak ka niyan, bgi nka so taw a piakawiswisān ka niyan, a go di nka zaopi so taw a piakasakitan ka niyan. Sii ko isa a lapiyat na: Rila inka so taw a piakasakitan ka niyan. Pianothol o Ahmad a go so at Tabarānī.

So sanang a Muslim na mapantang a go manapi a go makapiyaan ko manga taw sabap sa kasasabotan iyan a so agama niyan na mapantang a go manapi, na paliogat a mabaloy skaniyan mambo' a manapi a go maginawa, a ipphangapdi iyan so manga taw a makapagoongaya' a go makapagiino sa pantag sa panginam iyan ko limo' o Allāh (سُبْحَانَهُ وَتَعَالَى) a go so gagaw niyan.

Pitharo' o Jābir a so Rasūlullāh (صَلَّى اللهُ عَلَيْهِ وَسَلَّمَ) na pitharo' iyan a:

Ikhhalimo' o Allāh (سُبْحَانَهُ وَتَعَالَى) so taw a manapi igira miphasa a go igira miamasa, a go igira mian'kat (ko manga taw). Pianothol o al Bukhārī.

Pitharo' o Abū Mas'ūd al Ansāri a so Rasūlullāh (صَلَّى اللهُ عَلَيْهِ وَسَلَّمَ) na pitharo' iyan a:

Adn a sakataw a mama ko miaonaan iyo a da' a tanto a mala a amal iyan a go simba niyan, a rowar sa skaniyan na gii makizaog ko manga taw a skaniyan na kawasa, na ipphanton iyan ko manga gomagalbk on a di ran skatan so manga taw a makootang on a karrgnan. Na pitharo' o Allāh a: Skami na lawan a mapantang a go manapi a di skaniyan, sa lpasa niyo skaniyan ko siksa'.pianothol o Muslim.

Sayana' a mapiya ankoto a parangayan iyan a tanto a mapn'd ko timbangan, a go sayana' a mapiya a kaphangindawa on o taw ko balas iyan ko kaoma o mapn'd a gawii.

So sanang a Muslim na malolaw a go malangas ko manga taw ka isa oto a toos ko kababaloy niyan a mapantang a go manapi a mabolayoka'. Ka palaya dn anan oganapa] o kapiya o parangay o Muslim a go onayan anan o galbk a mapiya. Miaaloy ko Sahīh Muslim a so Rasūlullāh (صَلَّى اللهُ عَلَيْهِ وَسَلَّمَ) na pitharo' iyan a:

Di nka pagitongn sa maito' so isa a nganin a mapiya, apiya pn giya bo' a kabalak anka ko pagari nka a Muslim a makalalangas on a paras ka.

Inaloy a al Bukhārī a go so Muslim a phoon ko Jābir bin Abdillāh a pitharo' iyan a:

So Rasūlullāh (صَلَّى اللهُ عَلَيْهِ وَسَلَّمَ) na da ako niyan dn mailay, ko oriyan o kiasold akn ko Islam, inonta a makalangas rakn a paras iyan.

So kaphagingd a mazisipat o manga taw niyan so kapantang a go kanapi a go kabolayoka' sii ko ndolondolanan iran na giyoto na mapiya a phagingd a mabibilangataw a makokowa niyan so maporo' a parangay o kamamanosiya'i. Giyanan i kaphagingd a Islam a miathaong sii ko manga bowalan o Islam a go gioto so pphlobaan o Islam a kapakamoayan iyan ko lopa', a khibda' oto ko langowan a kaphagingd a salakaw a sii makaphapasod ko barandiya' a kanggona, a so manga taw niyan na di manga lalangas a manga kamara so katharo' iran na masasarino kiran so kassnddod ko kapanimo' sa tamok a gii ran minggayagomaya ko kaoyagoyag ran.

A aya ropaan iran na so kassnddod sa kasasalobaa iran ko pirak a pkhapadng iyan so kadg o ranon a go kapniniyawa sa pkhisonggod iyan siran ko kapphamakot a phliyot siran ko goliling a da' a ikhapos iyan.

Sabap san manga Muslim na kiatokawan tano a aya pithamanan a mapiya a Mu'min na so taw a sipat iyan so kapantang a go so kanapi a maginawa a go makapdiin, a opama o makamoayan anan sank'a'i a masa tano na makasarig tano ko sawan o kaada o sarig a go so kalilintad a di tano dn katawan o anda'i a masa a kitaplk anka'i a giikathitidawa' o manga taw tano a tanto a madakl a pphatay a taw sa pantag bo' sa maito' a sabap.

Opama o adn a somagad a masa a irampay sa saragon a da' a miaadn a rido' ko manga ingd tano sii sa Pilimpinas na mataan a magdam tano a giyankoto a somiagad a masa a da' a miabono' on a taw na gioto dn so kasorgaan sank'a'i a doniya, mapiya pn tanto tano a kapipilo'an ko kasaromag iyan ko kaoyagan.

Giyanan i manga karina sa mataan a so kapphagingd tano na tanto a mawatan ko ladiawan a kaphagingd a Islam a so pindiogod tano kagiya.

Giya masa tano wai na masa a kapangalandada a so pithamanan a maito' ko pagtaw na pipikirn iyan a go pkhailay ko goago'ay niyan a malawanda i lalag a go mawaraw a mangangandag a tangarasi na o giyanan i btad iyan na so mala' a go matgas ay taman a gii niyan kathgas a pphangarasi?

Lomindong tano ko Allāh (سُبْحَانَهُ وَتَعَالَى) o ba tano maadn a taw a matgas i parangay ka so taw a giyanan i btad iyan na mawatan o ba niyan mithoona so Rasūlullāh (صَلَّى اللهُ عَلَيْهِ وَسَلَّمَ) sa alongan a Qiyāmah.

وَأَقُولُ قَوْلِي هَذَا وَأَسْتَغْفِرُ اللَّهَ لِي وَلَكُمْ وَلِسَائِرِ الْمُسْلِمِينَ مِنْ كُلِّ ذَنْبٍ فَاسْتَغْفِرُوهُ
إِنَّهُ هُوَ التَّوَّابُ الرَّحِيمُ

Wa aqūlu qawlī hādā wa astagfirullāha lī wa lakum wa lisāiril Muslimīn min kulli dambin fastagfirūhu innahu Huwat Tawwābur Rahīm.